

გოგრის „მზიარული“ დღესასწაულის შესახებ (Halloween)

დადგა დრო, როდესაც ჩვენი საზოგადოება აღფრთოვანებით ემზადება Halloween-ის „ზეიმისთვის“. მაგრამ ძალზე ცოტამ იცის, თუ რას წარმოადგენს და როგორ წარმოიშვა იგი, რა არის მისი არსი და რატომ ეწინააღმდეგება ეკლესიის სწავლებას.

დღესასწაული Halloween დაიბადა ქრისტიანობამდელ ეპოქაში, ინგლისის, ირლანდიისა და ჩრდილოეთ საფრანგეთის (გალიის) კელტურ ტომებში. წარმართი კელტების რწმენით, სიკვდილი შობს სიცოცხლეს, ამიტომ „ახალი წლის“ დადგომას, საერთოდ ახალი სიცოცხლის დაბადებას, ისინი აღნიშნავდნენ შემოდგომით, 31 ოქტომბრისა და 1 ნოემბრის მიჯნაზე, შუალდით, როდესაც დგებოდა სიცივის, სიბნელისა და კვდომის ჟამი. ამ ღამეს ისინი განადიდებდნენ წარმართ ღმერთ სამქანის. რომელიც სიკვდილის მბრძანებლად მიაჩნდათ.

„ახალი წლის ზეიმის“ წინააღმდეგ დრუიდები (კელტი ქურუმები) ყველა ოჯახში აქრობდნენ კერას, ლამპრებსა და კოცონებს; მეორე დღის საღამოს კი აჩაღებდნენ უზარმაზარ კოცონს ბნელეთისა და სიკვდილის თავადისადმი მსხვერპლშეწირვების აღსასრულებლად. დრუიდების რწმენით, თუ სამქანი კმაყოფილებით მიიღებდა საკუთარ ერთგულთაგან მოძღვნილ შესაწირს, იგი ნებას დართავდა მიცვალებულთა სულებს, ამ დღეს მოენახულებინათ მშობლიური სახლები. აქედან იღებს სათავეს წარმართულ სამყაროში დამკვიდრებული ჩვეულება – Halloween -ის ღამეს მოჩვენებების, ალქაჯების და სხვადასხვა სულების კოსტუმებში გამოწყობილ

ადამიანთა ხეტიალი, რაც საიქიო სამყაროსა და უწმიდურ ძალებთან სააქაოს ურთიერთობის სიმბოლურ გამოხატულებას წარმოადგენს.

წარმართული კულტის მნიშვნელოვანი ნაწილია, აგრეთვე, „სერი“ Trick-or-Treat, როგორც სამქანის მსახური ბნელი ძალებისდმი შესაწირის მირთმევის სიმბოლოზირებული ქმედება. ითვლებოდა, რომ ბნელეთის, სიცივისა და სიკვდილის სამეფოში დამკვიდრებულთა სულები ცოცხალთა სამყაროში სტუმრობის დღეს დაუოკებელ შიმშილს გრძნობენ. ამიტომ კელტი წარმართები წინასწარ ამზადებდნენ სასმელ-საჭმელს ღამის წყვდიადში მოხეტიალე სულებისთვის; მათ სწამდათ, რომ სამქანის რისხვა და წყევლა დაატყდებოდა თავს ხალხს, თუ ამ სულებს ძღვენით არ დააკმაყოფილებდნენ.

აი, ამ წარმართული დღესასწაულის ჭეშმარიტი აზრი!

სავსებით ცხადია, რომ მართლმადიდებელი ქრისტიანისთვის დაუშვებელია მსგავს ზეიმებში მონაწილეობა, რადგან ამით იგი პირდაპირ აღიარებს კერპთაყვანისმცემლობას, ღალატობს უფალ ღმერთს და ჩვენს წმიდა ეკლესიას. მიცვალებულების განსახიერების რიტუალში მონაწილეობით, ღამის უკუნში ხეტიალითა და სანოვავის გამოთხოვა-ჩამორიგებით ჩვენ ვაცხადებთ, რომ გვსურს ურთიერთობა საიქიოს ბნელ სულებთან, რომელთა მბრძანებელი უკვე სამქანი კი არა, თავად სატანაა – მაცდური, რომელიც უფალ ღმერთს დაუპირისპირდა. სასმელ-საჭმლის დარიგებით უბრალოდ ტკბილეულით კი არ ვუმასპინძლებით ბავშვებს – ამით ძღვენს ვწირავთ სამქანის, ანუ სატანის ხსოვნას და გამოვხატავთ მისდამი პატივისცემას.

არსებობს Halloween-თან დაკავშირებული სხვა ტრადიციებიც, რომლებსაც უნდა განვეშოროთ, ასეთებია: ყოველგვარი მისნობა, ჯადოქრობა და გრძნეულება; ანდა ე.წ. „Jack O’Lantern“-ის (ლამპრის ჯეკის) გამოდგმა – ეს არის ამოსუფთავებული გოგრა, რომელზეც ამოკვეთილია საზარელი ნილაბი. გოგრაში (ძველად სხვა ბოსტნეულსაც იყენებდნენ) სანთელს ანთებდნენ „წმიდა“ კოცონიდან მოტანილი „ახალი“ ცეცხლით, მასზე ამოკვეთილი ნილაბი კი მიცვალებულს განასახიერებდა. ამგვარი „წმიდა ლამპარი“, რომელიც მთელი ღამის განმავლობაში ენთო, მაცხოვრისა და მისთვის სათნოყოფილთა ხატების წინ ანთებული წმიდა კანდელის ეშმაკეულ, გაუკუღმართებულ მიბაძვას წარმოადგენს. ამგვარი „სახუმარო“ ნილიანი გოგრით სახლის მორთვაც კი უკვე სიკვდილთან დაკავშირებულ წარმართულ დღესასწაულებში მონაწილეობის ტოლფასია.

წმიდა მამები დასავლეთის ადრექრისტიანული ეკლესიისა, რომელიც იმხანად მკაცრად მართლმადიდებელი იყო, ცდილობდნენ წინ აღდგომოდნენ კელტების ამ წარმართულ ტრადიციას; ამ მიზნით მათ ამავე დღეს დაადგინეს ქრისტიანული დღესასწაული „ყოველთა წმიდათა“ (აღმოსავლეთის ეკლესიაში იგი აღინიშნება სულთმოფენობიდან პირველ კვირას). ამ სახელწოდებიდან შეიქმნა გამოთქმა All Hallows’ Even (წინააღმდეგ ყოველთა წმიდათა), საიდანაც დროთა განმავლობაში მივიღეთ შემოკლებული ფორმა – Halloween. სამწუხაროდ, ადამიანთა უმეცრების ან უვიცობის გამო ხსენებულ წარმართულ ზეიმს შეცდომით უწოდეს Halloween, რადგან დასავლეთში მას და ყოველთა წმიდათა ქრისტიანულ დღესასწაულს ერთ დღეს აღნიშნავდნენ.

ეკლესიის ძალისხმევას – დაედგინა წარმართული ზეიმი, ანტიქრისტიანულად განწყობილმა ადამიანებმა უპასუხეს იმით, რომ მეტი მოშურნეობით იწყეს ამ საღამოს აღნიშვნა: ბევრ რიტუალს ასრულებდნენ ქრისტიანული ღვთისმსახურების შესაბილწად და დასაცინად; ჩონჩხის კოსტუმში გამოწყობილნი დასცინოდნენ ეკლესიის მიერ წმიდა ნაწილების თაყვანისცემის ტრადიციას; მკრეხელური ქმედებებისთვის იყენებდნენ მოპარულ ჯვრებს და წმიდა ნაწილებსაც კი. მოწყალეების გამოთხოვის ტრადიცია ქრისტიანების სისტემატური დევნის მიზეზი გახდა, რადგან მათ თავიანთი რწმენის გამო არ შეეძლოთ მონაწილეობა ბნელეთისა და წყვდიადის თავადისადმი მიძღვნილ დღესასწაულში.

რატომ დამკვიდრდა ესოდენ მყარად ბევრ ქრისტიანში მართლმადიდებლობასთან აშკარად შეუთავსებელი წამართული კულტი? ამ ყოველივეს მიზეზი უპირველესად იმ ქრისტიანებში უნდა ვეძებოთ, რომლებიც საკუთარი სულიერი აპათიისა და დაჩლუნგების გამო უღმერთოებას და ღვთისგან განდგომას უწყობენ ხელს. ისინი, ვინც გვარწმუნებენ, რომ Halloween და მისი მსგავსი დღესასწაულები, მიუხედავად მათი აშკარად წარმართული ფესვებისა და კერპთაყვანისმცემლური არსისა, უსაფრთხოა და უწყინარი და ამდენად დიდი მნიშვნელობა არც უნდა მივანიჭოთ მათ, ანგრევენ ჩვენს სულიერ ბალავარს, ხელს უწყობენ წარმართობისა და ათეიზმის გავრცელებას.

„ღღესასწაული“ Halloween ანგრევს წმიდა ეკლესიის ბურჯებს – აღმართულს იმ მოწამეთა სისხლზე, რომლებმაც უარი თქვეს კერპების ნებისმიერ თაყვანისცემასა და მსახურებაზე. მართლმადიდებელ


ქრისტიანს ჰმართებს, მკაცრად წინააღმდეგს მსგავს მოვლენებს, რამეთუ სახარების სწავლებით უფალი ღმერთია ჩვენი ყოველი საქციელისა და რწმენის მსაჯული; საქმენი ჩვენნი ან „ღმერთს ეძღვნება“ ან „ღვთის წინააღმდეგ“ არის მიმართული – შუალედური, „ნეიტრალური“ გზა არ არსებობს!...

დღეს ჩვენ მოწმენი ვართ სატანური კულტების ჩასახვისა. არსებობს ცნობები, რომ ნოემბრის ღამეს სატანური „მსახურებანი“ აღესრულება და ეშმაკის მსახურნი საამისოდ ადამიანებს სწირავენ მსხვერპლად. ახლა სატანისტებმა ხელი მიჰყვეს მართლმადიდებელ მღვდელმსახურთა რიტუალურ მკვლელობებსაც, რაც არაერთხელ მოხდა კალიფორნიის შტატში. სატანა ყველგან შლის ბადეს, რათა რაც შეიძლება მეტი უღანაშაულო ადამიანი გააბას. საგაზეთო ჯიხურები სავსეა გამოცემებით სპირიტუალის, ზებუნებრივი მოვლენების, ოკულტური სეანსების, ცრუწინასწარმეტყველებებისა და ყოველგვარ ეშმაკულ მოვლენათა შესახებ – ყველა ისინი სატანას ემსახურებიან, რადგან მომდინარეობენ არა სულიწმიდისგან, არამედ ამასოფლის სულით არიან გაუღენთილნი.

**ყოველწმიდა ღვთისმშობლის საფარველის
სახ. ტაძრის გამომცემლობა.
ლოს ანჟელესი, კალიფორნია.
(იბეჭდება მცირეოდენი შემოკლებით და რედაქტირებით).**




გთხოვთ დაგვიკავშირდეთ:
www.religia.ge



მართლმადიდებელ მშობელთა კავშირის
მიმართვა

Halloween - წარმართულ-სატანური „ღღესასწაული“



ვრცელდება უფასოდ
(სხვასაც წააკითხეთ)